

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- राष्ट्रपति द्रौपदी मुर्मू होरें आखेआ जे आदिवासी समुदायें दी तेजियां कन्नै तरक्की राश्ट्रीय प्राथमिकता ऐ।
- मुख्यमंत्री उमर अब्दुल्ला होरें नमीं दिल्ली च राष्ट्रपति द्रौपदी मुर्मू हुंदे कन्नै मलाटी कीती।
- मुख्य सचिव होरें यूटी च भर्ती प्रक्रिया गी तेज करने दे निर्देश जारी कीते।
- अज्ज समूलचे देसै च धार्मिक जोश जज्बे कन्नै गुरुपूर्व मनाया जा'रदा ऐ। राष्ट्रपति, उपराष्ट्रपति ते प्रधानमंत्री होरें इस मौके पर लोकें गी शुभकामनां दित्तियां न।
- किश्तवाड़ च अज्ज मेगा जनजातीय उत्सव रंभ होआ करदा ऐ।

<><><><><><>

President Janjatiya

राष्ट्रपति द्रौपदी मुर्मू होरें आखेआ ऐ जे देस सेई मायने च उसलै गै विकसित होग जिसलै आदिवासी लोक विकसित होंगन। जनजातीय गौरव दिवस दी पूर्व संजा पर कल संजा राष्ट्र गी संबोधत करदे होई श्रीमती मुर्मू होरें आखेआ जे आदिवासी समुदाय दे लोकें दी तेजिया कन्नै तरक्की बाद्धा करना राश्ट्री प्राथमिकता ऐ। राष्ट्रपति होरें गलाया जे राष्ट्र चांहदा ऐ जे आदिवासी समुदाय दी सदिएं परानी पंछान बरकरार रवै ते कन्नै गै ओह अज्जै कलै दे विकास दी बत्तै पर अगड़ा बधदे रौहन। उनें इस गल्ला पर जोर दित्ता जे मजूदा सरकार आदिवासी विकास ते कल्याण ते कल्याण दी यात्रा गी तेज रफ्तार कन्नै अगगे बधा'रदी ऐ।

<><><><><><>

PM Janjatiya

प्रधानमंत्री नरेन्द्र मोदी होर जनजाती गौरव दिवस ते भगवान बिरसा मुंडा हुंदी 150मीं जयंती दे समारोहें दे शुभारंभ दे मौके पर कल बिहार दे जमुई जाडन। प्रधानमंत्री होर भगवान बिरसा मुंडा हुंदे सम्मान च इक यादगारी सिक्का ते डाक टिकट जारी करडन।

ओह ग्रामीण ते दूर-दरेडे इलाकें च जनजाती समुदास दे विकास लेई 6 ज्हार 640 करोड़ रुपें शा मते दी विकास परियोजनाएं दा उद्घाटन करडन ते केई परियोजनाएं दा नीह पत्थर बी रखडन। श्री मोदी होर प्रधानमंत्री जनजाति आदिवासी न्यास महाअभियान तैहत् बनाए गेदे 11 ज्हार मकानें दे गृह प्रवेश च बी शामिल होडन। प्रधानमंत्री होर जनजातीय इलाकें च सेहत दिक्खभाल बधाने लेई आदिवासी न्यास महाअभियान तैहत् 23 गश्ती मेडिकल यूनिट, धरती आबा जनजातीय ग्राम उत्कर्ष अभियान दे तैहत् 30 बाददू गश्ती मेडिकल यूनिटें, 300 वन धन विकास केंद्रें ते जनजाती विद्यार्थीएं लेई 10 एकलव्य मॉडल रिहायशी स्कूलें दा बी उद्घाटन करडन। एहदे अलावा इस मौके पर जम्मू-कश्मीर दे श्रीनगर ते सिक्कम दे गंगटोक च द'ऊं जनजाती शोध संस्थानें दा बी उद्घाटन कीता जाह्ग। प्रधानमंत्री होर आदिवासी इलाकें च संपर्क च सुधार लेई 500 किलोमीटर लम्मी सिडकें ते प्रधानमंत्री जनजाती आदिवासी न्यास महाअभियान तैहत् 100 बहुउद्देश्यी केंद्रें दी बी नीह पत्थर रखडन।

<><><><><><>

CM Meet President

मुख्यमंत्री उमर अब्दुल्ला होरें कल नमीं दिल्ली राष्ट्रपति भवन च राष्ट्रपति द्रौपदी मुर्मू हुंदे कन्नै मलाटी लाई। राष्ट्रपति हुंदे अधिकारिक एक्स एकाउंट नै दौनें बश्कार लग्गी दी बैठक दी जानकारी दिंदे होई इक पोस्ट सांझी कीती। जम्मू कश्मीर सरकार दे मुख्यमंत्री दे तौरा पर पदभार सांभने परेंत मुख्यमंत्री उमर अब्दुल्ला हुंदी एह मलाटी इक महत्वै आली गै ऐ। हाल दे हफ्ते च उमर अब्दुल्ला होरें प्रधानमंत्री नरेन्द्र मोदी, गृहमंत्री अमित शाह, रक्षा मंत्री राजनाथ सिंह ते केन्द्र शिडक परिवहन मंत्री नितिन गडकरी हुदं सनें बड्डे लीडरें कन्नै गल्लबात कीती ऐ। कल उनें उपराष्ट्रपति जगदीप धनखड़ हुंदे कन्नै बी मलाटी लाई। मुख्यमंत्री होर अज्ज वित्त मंत्री निर्मला सीतारमण कन्नै मिलगंन।

<><><><><><>

Chief Secretary

मुख्य सचिव अटल डुल्लू होरें सेवा चयन भर्ती बोर्ड एसएसआरबी गी निर्देश जारी करदे होई आखेआ ऐ जे ओ यूटी च भर्ती आली प्रक्रिया च तेजी आनन ते इसी समें बद्ध प्रक्रिया बनान। बक्ख-बक्ख सरकारी मैह्कमे लेई एसएसआरबी आस्सेआ कीते जाने आली भर्ती दे कम्मकाज दा जायजा लैने लेई कल सामान्य प्रशासन विभाग जीएडी दी इक बैठक च श्री डुल्लू होरें भर्ती प्रक्रिया दा इक सलाना कलेंडर बनाने लेई आखेआ तां जे मेदवारें गी एहदे बारे च साफ जानकारी थोई सकै ते ओह अपनी-अपनी तैआरी करी सकन। इस मौके पर जेकेएसएसआरबी अध्यक्ष इंदु कंवल हचब होरें दस्सेआ जे 2019 थमां बोर्ड नै 22 ज्हार 624 स्लैक्शनां कीतियां न ते होर दुए 874 औहदे लेई ताल दी प्रक्रिया गी खीरी शक्ल दिक्ती जा'रदी ऐ।

एहदे इलावा बैठक च इब्बी दस्सेआ गोओ औने आले हफते च 4921 औहदे लेई मकाबले आले मतेयान करोआए जांगन। एह बी जानकारी दित्ती गई जे बोर्ड कश विज्ञापन लेई 3299 औहदे उपलब्ध न।

<><><><><><>

Police Transfers

एलजी प्रशासन नै बक्ख-बक्ख जिले दे एसएसपी सनें 38 पुलस अफसरें दे तबादले ते नियुक्ति दे हुक्म जारी कीते न। इक आदेश मूजब एसीबी थमां एसएसपी दे औहदे पर वापस भेजे गेदे संदीप वजीर होरें गी एआईजी कार्मिक पीएचक्यू दे औहदे पर लाया गेआ ऐ, जिल्ले के गुरिंदरपाल सिंह होरें गी निदेशक पुलस दूरसंचार नियुक्त कीता गेआ ऐ। राजेश कुमार शर्मा होरें गी एसएसपी सिक्यूरिटी जम्मू, गौरव सिकरवार होरें गी एसएसपी राजौरी, विरेन्द्र सिंह मन्हास होरें गी एसएसपी सांबा, संदीप कुमार मेहता होरें गी एसएसपी डोडा दे औहदे पर तैनात कीता गेआ ऐ। इंदे इलावा शफकल हुसैन होरें गी एसएसपी पुंछ ते परमवीर सिंह होरें गी एसएसपी रियासी लाया गेआ ऐ।

<><><><><><>

Pensioner-Verification

जम्मू कश्मीर सरकारै पेंशन लैने आलें दी आपुं जाइयै वैरीफिकेशन करोआने दी खीरी तरीक गी 30 नवम्बर 2024 तगर बधाई दित्ता ऐ। इक हुकमै च खजाना मैह्कमे नै इस सरबंघै च खीरी तरीक बधाने बारे जानकारी दिंदे होई दस्सेआ जे यूटी कुल 2.43 लक्ख पेंशन लैने आले चा 2.28 पेंशनरें वैरीफिकेशन आली प्रक्रिया गी पूरा करी लैता ऐ। ट्रेजरी दफ्तरै गी आखेआ गेआ ऐ जे ओह् उनें लोकें दी पेंशन गी रोक़ी देन जेह्ड़े बधाई गेदी खीरी तरीक जां ओहदे कोला पैहले वैरीफिकेशन लेई हाजर नेई होंदे।

<><><><><><>

Gurupurav

गुरु नानक जयंति दा ध्यार अज्ज पूरे देश च धार्मिक श्रद्धा ते चायें-चायें मनाया जा'रदा ऐ। एह ध्याड़ा सिक्ख धर्म दी स्थापना करने आले पैहले सिक्ख गुरु गुरु नानक देव जी हुंदी जंयति दा प्रतीक ऐ। इस ब8रे गुरु नानक देव जी हुंदी 555मीं जंयति ऐ। अज्ज दे ध्याड़े विश्व दे बक्ख-बक्ख हिस्से च रवा'रदे श्रद्धालु गुरुद्वारे जाइयै मत्था टेकदे न ते सब्बने दी भलाई लेई प्रार्थना करदे न।

<><><><><><>

President Message

राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेन्द्र मोदी होरें अज्ज गुरु नानक देव जी हुंदे प्रकाश पर्व दियां सब्बने लोकें गी ममारकबाद दित्ती ऐ। अपने सनेह च राष्ट्रपति होरें देश ते विदेश च रवा'रदे सब्बने भारतीय ते चेचा करी सिक्ख समुदाय गी बधाई दित्ती ऐ। उनें गलाया जे गुरु नानक देव जी होरें प्रेम, विश्वास, सच्च ते त्याग उपपर बल दित्ता ते उंदी सिक्खेआ लोकें गी नैतिक-बुल्ले आली बक्खी लेई जंदी ऐ। उपराष्ट्रपति होरें बी अपने सनेह च गलाया जे गुरु नानक देव जी हुंदा जीवन मानवता लेई ज्ञान ते सेवा दा प्रतीक ऐ। प्रधानमंत्री होरें अपने बधाई सनेह च गलाया जे गुरु नानक देवी जी हुंदी सिक्खेआ म्हेशां असेंगी आपसी भाईचारे, प्यार, दया ते मानवता दा जज्बा बनाई रखने लेई दिल बधांदियां रौंहगन।

<><><><><><>

LG-Message

जम्मू कश्मीर दे उपराज्यपाल मनोज सिन्हा होरें बी लोकें गी गुरु नानक देव जी हुंदे प्रकाश पर्व दी बधाई दित्ती ऐ। आकाशवाणी दे जम्मू संवाददाता नै जानकारी दित्ती ऐ जे उपराज्यपाल होरें अपने बधाई सनेह च गलाया जे गुरु नानक देव जी हुंदा जीवन ते सिक्खेआ सब्बने लेई प्रेरणा दा स्त्रोत ऐ ते म्हेशां मानवता दे रस्ते दा मार्गदर्शन करदे रौंहगन।

<><><><><><>

CM-Message

जम्मू कश्मीर दे मुख्यमंत्री उमर अब्दुल्ला होरें बी लोकें गी गुरु नानक देव जयंति दी बधाई दित्ती ऐ। अपने सनेह च मुख्यमंत्री होरें सिक्ख समुदाय गी बधाई दित्ती ते गुरु नानक देव जी हुंदी करुणा, एकता ते निस्वार्थ सेवा म्हेशां गै सब्बने धर्म दे लोकें लेई प्रेरणा दा स्त्रोत रेइयां न। उनें गलाया जे असेंगी आपसी भाईचारे ते एकता उपपर आधारत समाज दा निर्माण करना लोड़चदा ऐ।

<><><><><><>

Jhiri Mela

ऐतिहासक सलाना झिड़ी मेले दी कल जम्मू जिले च शुरूआत होई। इस ब'रे एह मेला 10एं दिनें तगर चलोग। देश दे उत्तरी राज्यें ते चेचा करी दिल्ली-एनसीआर थमां लक्खें दी गिनतरी च लोक इस सलाना झिड़ी मेले च शिरकत करगन।

झिड़ी मेला बाबा जित्त मल जेहड़े बाबा जित्तो दे नां कन्नै मशहूर न, उंदे सर्वोच्च बलिदान दे चेते च मनाया जंदा ऐ। बाबा जित्तो होरें पराने समें च जमींदारें आस्सेआ करसानें दे शोशण खलाफ अवाल बुलंद कीती ही।

<><><><><><><>

Tribal Fest Kihstwar

किश्तवाड़ दा जिला प्रशासन अज्ज ऐतिहासक चौगान मैदान च इक बड़्हे जनजातीय मेले दा सरिस्ता करा करदा ऐ। आकाशवाणी दे जम्मू संवाददाता नै दस्सेआ जे एह मेला सुतंत्रता सेनानी बिरसा मुंडा हुंदी जयंति दे उपलक्ष च जनजातीय गौरव दिवस दे तौरा पर मनाया जंदा ऐ। एह धरती आभा जनजातीय ग्राम उम्कर्ष अभियान दा इक हिस्सा ऐ जेहड़ा 15 नवम्बर शा लेइयै 26 नवम्बर तगर चलने आला सूचना, शिक्षा ते संचार दा इक राष्ट्रव्यापी अभियान ऐ जेहदा मकसद जनजातीय समुदायें गी समाजी, सियासी माली ते कनूनी हक-हकूकें बारे जागरूक बनाइयै उनेंगी बाइखियात बनाना ऐ। एह कार्यक्रम मकामी तौरा पर तैआर आदिवासी कलाकृतिएं, हस्तशिल्पें ते कृषि उत्पादें गी दस्सने आले स्टाल होंगन जेहड़े इलाके दे आदिवासी समुदायें दे रिवायती कौशलें दी नूठी झलक पेश करगन। किश्तवाड़ दे डीसी राजेश कुमार शवन होरें किश्तवाड़ ते आले दुआले दे लोकें गी खुल्ला साददा दित्ता ऐ।

<><><><><><><>

Jammu Pex

डाक विभाग आस्सेआ जम्मू पैक्स 2024 नां दी दऊं रोजा डाक टिकट प्रदर्शनी जेहड़ी डाक टिकटें राएं इतिहास ते सांस्कृतिक विरासत गी प्रदर्शत करा'रदी ही, दा कल जम्मू दे केन्द्र च समापन होई गेआ। आकाशवाणी दे जम्मू संवाददाता नै जानकारी दित्ती ऐ जे इस प्रदर्शनी दे दुए ध्याड़े रणबीर हायर सकेँडरी स्कूल जम्मू आस्सेआ इक विशेष टिकट जारी कीती गई। कार्यक्रम दा समापन भारतीय संस्कृतिक परिषद आस्सेआ डोगरा संस्कृतिक उप्पर आधारत इक मंत्र मुग्ध करने आले संस्कृतिक कार्यक्रम कन्नै होआ.....

<><><><><><><>